

L'EVA, L'EVA ...

... l'eva dulza cumè l' üga,
segurida cumè 'n pomm :
la pareva fada aposta
par fa pèrd la testa a 'n omm !

... l'eva dulza quela tusa,
prufümada 'mè un narânz,
bèl' in carna e tân' furmusa,
che ga n'era fin d'avânz !

... l'eva bona com'è 'l pân,
quân' che 'l pân l' è minga poss ;
una pèll liscia, d'avori,
dü pumèj tra ul biârch e 'l ross !

... l'eva valta, cavij biûnd,
e i so gamb finivan pü,
do bucétt in sül davanti :
daparluur ga stavan sü !

Un nasìn a la francesa,
do uregètt bèj cuntagnüü,
un dadrée ... sarìa 'n'ufesa
'na mi' rima cun la ... üü!

... l'eva propi 'a fin dul mûnd,
e nissün l'èa méj da lée :
ta fissava cun quij ugiuni,
'mé par di : sun chî ! vardée !

... l'eva propi, propi bbona !
sa muveva in leggiadria,
la pareva una madona
che püssée a sa po mia ...

... l'eva, l'eva ...” leva-sü !
che tra pooch a fémm mesdî !
's' ta sücèed istamatina ?
fin quân' l'è te vö' durmî ? “